

Opitz, Martin: Vff ein paar Händschuch (1624)

1 Glückseelig weret jhr/ Händschuch/ wann jhr solt können
2 Ewr groß Glückseligkeit vernünfftiglich erkennen/
3 Es sollen herbergen in euch zwey Händelein/
4 Die weisser als der Schnee/ purer dann Helffenbein/
5 Deren subtiligkeit die schönste Perlen weichen.
6 Was soll ich aber sie vil mit dem Schnee vergleichen/
7 Mit Perlen oder ein einigem Helffenbein?
8 In jhnen alles ist/ was irgendt schön magsein.
9 Seht hier die Nägelein/ so zierlich rund beschaffen/
10 Der zarten Jungfrawschafft holdselig wehr vnd Waffen/
11 Seht hier die hurtige gebogne Gleichelein/
12 Die
13 Seht hier die Fingerlein/ die er vor Pfeil thut preisen
14 Seiner Artillerey/ ob sie sich schon erweisen
15 Vngleich in jhrer leng/ seind sie doch gleich in dem/
16 Daß sie vor anderen allein sein angenehm.
17 Beseht die flache Handt/ innwendig der jhr finden
18 Werd manch verborgne Kunst nit jedem zuergründen/
19 Ihr werdet finden viel geheimnuß der Natur
20 Artig gezirckelt auß/ gleich als mit einer Schnur.
21 Da stehet all mein Glück vnd vnglück vffgeschrieben/
22 Da steht wie hoch ich sie/ wie hoch sie mich muß lieben/
23 So manche Lini sich allda entwerffen thut/
24 So manche Tugend helt in sich jhr Keuscher muth.
25 Glückseelig seit jhr zwar/ Händschuch/ denen vergönnet
26 Daß jhr der Liebsten Händt so offte küssen könnet/
27 Stoltzirt drumb aber nicht/ die Ehr so jhr empfängt
28 Von jhr allein vnd nicht von euch an euch gelangt.
29 Wie stattlich jhr auch seit/ wan~sie euch an jhr treget/
30 Also gering jhr seit/ so bald sie euch ableget/
31 Doch/ dieweil jhr durch mich seit gebracht zu diesem Glück/
32 Last mich genießen auch bißweil ein guten blick.